



S Nun diser gestiert planus abgestolen fertig ist/ als dan neu von wasser vnd dem grund
zu gleicher weys wie er dann hie foren auf sein abgestolen plano stet. Das zu machen sind
also. Nym die leng von einer seitten des würffels im förderen nidergedruckten grund/vn
setz die mitten mit zweyen puncten. x. y. auf die vnderen zwerchlini. f. g. deiner ystigen abgestolnen
störung/ in den weitten von dem eck. f. so weit sie stet im förderen nidergedruckten grund/ von der sei
ten des gestierten plano. e. f. Darnach zeuch zwo streymlini auß dem näherten aug in die zwen pun
cten. x. y. zwischen dise zwo lini muß der würffel mit seynrer vnderen störung hinden auf disen planu
gestelt werden. Aber wie weyt hinder sich / das such also / So du in dem förderen nidergedruckten
grund ein ortstrich. e. g. reist/ so wirt auch diser ortstrich eyn ortstrich im nidergedruckten grund des
würffels sein/ dann dise lini get durch seine zwey eck. j. a. vnd. z. c. Nun so das ist/ so zeuch auch ein
ortlini. e. g. in deinem ystigem abgestolnem feld/ wo dan dise durchschneyt die zwo streymlini. x. y. da
setz auf der lini. x. ein. a. vnd auf der lini. y. ein. c. Darnach zeuch zwo zwerchlini auß den puncten. a. c.
wo dann die zwerchlini. a. durchschneydet die streymlini. y. da setz ein. d. Aber wo die zwerchlini. c.
die streymlini. x. durchschneydet / da setz ein. b. also stet der gestiert planus vnden an dem würffel mit
sein vier ecken recht auf dem gestierten abgestolnen plano. e. f. g. h. wie da foren in dem anderen.
Nun zeuch auß den vier ecken. a. b. c. d. vber sich vier aufrecht lini/ vnd die förderen zwo zeuch so
hoch vber sich als lang da ist die zwerchlini. b. c. vn zeuch oben in vorgemelter höhe ein zwerchlini von
einer lini zu der andern/ vn setz in die selben zwey eck ob dem. b. die ziffer. 2. vnd ob dem. c. die ziffer. 3.
Darnach zeuch zwo streymlinien auß dem nehern aug in die zwey eck. 2. 3. wo sie dan abschneiden
a. d. da setz ob dem. a. die ziffer. j. vnd ob dem. d. setz. 4. vnd zeuch ein zwerchlini. i. 4. vn. 2. 3. Also ist
diser würffel recht gemacht/ wie in dem forigen abgestolnen grund. Wie ich dann das hienach also
hab aufgerissen. Et ich weiter gehē.

